

大學衍義

三

共十



RARE  
BOOK

Cha  
1.21  
v.3



言誠

誠

聖之誠

真西山讀書記乙集上大學衍義卷第十二

格物致知之要一

明道術

誠者天之道也誠之者人之道也誠者不勉而中  
不思而得從容中道聖人也誠之者擇善而固執  
之者也博學之審問之慎思之明辨之篤行之有  
弗學學之弗能弗措也有弗問問之弗知弗措也  
有弗思思之弗得弗措也有弗辨辨之弗明弗措  
也有弗行行之弗篤弗措也人一能之己百之人  
十能之己千之果能此道矣雖愚必明雖柔必強  
朱熹曰誠者真實無妄之謂天理之本然也誠  
之者未能真實無妄而欲其真實無妄人事之  
當然也聖人之德渾然天理真實無妄不待思



# 誠

吳之誠  
吳之誠

勉而從容中道則亦天之道也未至於聖則  
能無人欲之私而其為德不能皆實故未能不  
思而得則必擇善而後可以明善未能不勉而  
中則必固執而後可以誠身此則所謂人之道  
也不思而得生知也不勉而中安行也擇善學  
知以下之事固執利行以下之事也博學審問  
慎思明辨篤行此誠之之目也學問思辨所以  
擇善而為知篤行所以固執而為仁有弗學學  
之弗能弗措以下則勇之事也君子之學不為  
則已為之則必要其成故常百倍其功至於愚  
而明則擇善之効柔而強則固執之効也  
呂大臨曰君子所以學者為能變化氣質而已



性才

不變才

德勝氣質則愚者可進於明柔者可進於強不能勝之則雖有志於學亦愚不能明柔不能立而已矣蓋均善而無惡者性也人所同也昏明強弱之稟不齊者才也人所異也誠之者所以及其同而變其異也夫以不美之質求變而美非百倍其功不足以致之今以鹵莽滅裂之學或作或輟欲變其不美之質及不能變則曰天質不美非學所能變是果於自棄其為不仁甚矣

或問誠之為義其詳可得聞乎曰難言也姑以其名義言之則真實無妄之云也若事理之得此名則亦隨其所指之大小而皆有得乎真實



# 誠

天之誠實

無妄之意耳。蓋以自然之理言之。天地之間。惟天理為至實。而無妄故。天理得誠之名。若所謂天之道。鬼神之德是也。以德言之。則有生之類。惟聖人之心為至實。而無妄故。聖人得誠之名。若所謂不勉而中。不思而得是也。至於隨事而言。則一念之實亦誠也。一事之實亦誠也。一行之實亦誠也。是則大小雖曰不同。然其義之所歸。則未始不在於實也。曰然。則天理聖人之所以若是其實者何也。曰一則純。二則雜。純則誠。雜則妄。此常物之大情也。夫天之所以為天也。冲漠無朕。而萬理無所不具。然其為體則一而已矣。未始有物以雜之也。是以無聲無臭。



衆人不能識

至之誠實

無思無為而一元之氣春秋冬夏晝夜昏明未嘗有一息之謬天下之物洪纖巨細飛潛動植亦莫不各得其性命之正以生而未嘗有一毫之差此天理之所以為實而不要者也若夫人物之生性命之正固亦莫非天理之實但以氣質之偏口鼻耳目四肢之好得以蔽之而私欲生焉是以當其惻隱之發而忮害雜之則所以為仁者有不實矣當其羞惡之發而貪昧雜之則所以為義者有不實矣此常人之心所以雖欲勉於為善而內外隱顯常不免於二致其甚至於詐偽欺罔而卒墮於小人之歸則以二者雜之故也惟聖人氣質清純渾然天理初無人



# 誠

常人擇善  
固執則誠

欲之私以病之是以仁則表裏皆仁而無一毫  
之不仁義則表裏皆義而無一毫之不義其為  
德也固舉天下之善而無一事之或遺而其為  
善也又極天下之實而無一毫之不滿此其所  
以不勉不思從容中道而動容周旋莫不中禮  
也曰然則常人未免於私欲而無以實其德者  
柰何曰聖人固已言之矣亦曰擇善而固執之  
耳夫於天下之事皆有以知其如是為善而不  
能不為知其如是為惡而不能不去則其為善  
去惡之心固已篤矣於是而又加以固執之功  
雖其不睹不聞之間亦以戒慎恐懼而不敢懈  
則凡所謂私欲者出而無所施於外入而無所



誠明

至誠  
能化

藏於中自將消磨泯滅不得以為吾之病而吾  
之德又何患於不實哉是則所謂誠之者也又  
曰自然而實者天也必期於實者人而天也  
自誠明謂之性也自由自明誠謂之教明則誠矣誠  
則明矣

朱熹曰德無不實而明無不照者聖人之德所  
性而有者也天道也先明乎善而後能實其善  
者賢人之學由教而入者也人道也誠則無不  
明矣明則可以至於誠矣

唯天下至誠為能盡其性能盡其性則能盡人之  
性能盡人之性則能盡物之性能盡物之性則可  
以贊天地之化育可以贊天地之化育則可以



# 誠

天地參矣其次致曲曲能有誠誠則形形則著著  
則明明則動動則變變則化唯天下至誠為能化  
朱熹曰天下至誠謂聖人之德之實天下莫能  
加也盡其性者德無不實故無人欲之私而天  
命之在我者察之由之巨細精粗無毫髮之不  
盡也人物之性亦我之性但以所賦形氣不同  
而有異耳能盡之者謂知之無不明處之無不  
當也贊猶助也與天地參謂與天地並立而為  
三也其次通大賢以下凡誠有未至者而言也  
致推致也曲一偏也形者積中而形外著則又  
加顯矣明則又有光輝發越之盛動者誠能動  
物變者物從而變化則有不知其所以然者蓋



盡己之性

盡人之性

盡物之性

天不為人能  
為而贊助

人之性無不同而氣則有異故惟聖能舉其性之全體而盡之其次則必自善端發見之偏而悉推致之以各至其極也曲無不致則德無不實而形著動變之効自不能已積而至於能化則其至誠之妙初不異於聖人也

又曰盡己之性如在父子則親在君臣則義在兄弟則愛之類已無一之不盡盡人之性如黎民於變時雍盡物之性如鳥獸魚鼈咸若如此則可以贊天地之化育皆是實事非私心之倣像也

又曰人在天地中間雖止是一理然天人所為各自有分人所能為者天有所不能為如天生



天地之化  
人贊之

至誠之功  
在盡性

生物而耕種必用人水能潤物而灌溉必用人  
火能燠物而薪爨必用人財成輔相必用人為  
非贊助而何

呂大臨曰堯命羲和欽若昊天若民之析因夷  
燠鳥獸之孳尾希革毛毳毼毛無不與知則所  
贊可知贊者行其所無事順以養之而已天地  
之化猶有所不及必人贊之而後備則天地非  
人不立故人與天地並立而為三

臣按贊化育參天地乃至誠之極功而其本  
則盡己之性而已此聖人所以可學而至也  
其次致曲即學之事臣謂曲猶曲禮之曲蓋  
聖人生知安行不待致曲自能盡性自大賢



# 誠

誠實之終始

理之實

心之實

以下則必於纖微委曲而用其功即前章博學審問慎思明辨篤行之意顏子之四勿曾子之三省皆致曲之事也

誠者物之終始不誠無物是故君子誠之為貴朱熹曰誠之為言實而已矣然此篇之中有以理之實而言者如曰誠之不可揜之類是也有以心之實而言者如曰反諸身不誠之類是也讀者各隨文意所指而尋之則其義各得矣所謂誠者物之終始不誠無物者以理言之則天地之理至實而無一息之妄故自古至今無一物之不實而一物之中自始至終皆實理之所為也以心言之則聖人之心亦至實而無一息



之妄故從生至死無一事之不實而一事之  
自始至終皆實心之所為也此所謂誠者物之  
終始者然也苟未至於聖人而其本心之實猶  
未免於間斷則其實有是心之初以至未有間  
斷之前所為無不實者及其間斷之後以至于  
未相接續之前凡所云為皆無實之可言雖有  
其事亦不異於無有矣如曰三月不違則三月  
之間所為皆實而三月之後未免於無實蓋不  
違之終始即其事之終始也日月至焉則至此  
之時所為皆實而去此之後未免於無實蓋至  
焉之終始即其事之終始也是則所謂不誠無  
物者然也以是言之則在天者本無不實之理



# 誠

人主修德之  
實

五達道  
三達德  
行在

故凡物之生於理者必有是理方有是物未有  
無其理而徒有不實之物者也在人者或有不  
實之心故凡物之出於心者必有是心之實乃  
有是物之實未有無其心之實而能有其物之  
實者也程子所謂徹頭徹尾者蓋如此也

臣按此章之義上下皆所當知自人君言之  
必有修德之實心然後有修德之實事有愛  
民之實心然後有愛民之實事未有無是心  
之實而能有其事之實者也以是推之餘莫  
不然是故君子實之為貴

天下之達道五所以行之者三曰君臣也父子也  
夫婦也昆弟也朋友之交也五者天下之達道



# 誠

知仁勇三者天下之達德也所以行之者一也

臣按君臣父子以至朋友之交此五者天下共由之路也故曰達道知仁勇三者人所同得也故曰達德道雖人之所共由然其知不足以及之則君之當仁臣之當敬子之當孝父之當慈也未必不昧其所以然知雖及之而仁不能守仁雖能守而勇不能斷則於當行之理或奪於私欲或蔽於利害以至蔑天常而敗人紀者多矣故曰所以行之者三德雖人所同得然或勉強焉或矯飾焉則知出於數術仁流於姑息勇過於強暴而德非其德矣故行之必本於誠一者誠也三者皆真實而無妄是之謂誠德至於



漢高

晉武

唐太宗

言仁知勇

誠則以之為君必盡君道以之為臣必盡臣道處夫婦昆弟朋友之間無不盡其道者漢高帝溺嬖寵而兆人疢之禍以私欲蔽其知也晉武帝違親命而虧介弟之恩以讒賊害其仁也唐太宗於廢承乾立子治之際幾不能決以愛牽其勇也然則人君之於三德其可使有一之闕哉其可有一之不出於誠哉

言誠以上旨

子曰好學近乎知力行近乎仁知耻近乎勇知斯三者則知所以修身知所以修身則知所以治人知所以治人則知所以治天下國家矣

臣按前章既言三達德此又教人以入德之路也夫智必上智仁必至仁勇必大勇然後為



# 智仁勇

# 仁義

孟子七篇以  
仁義為首

然豈易遽及哉苟能好學不倦則亦近乎智矣  
力行不已則亦近乎仁矣以不若人為耻則亦  
近乎勇矣蓋好學所以明理也力行所以進道  
也知耻所以立志也能於是三者用其功則所  
謂三達德者庶乎可漸致矣知斯三者則修身  
治人之道不外乎此自家而國自國而天下特  
推之而已爾

此章言  
智仁勇

孟子見梁惠王王曰叟不遠千里而來亦將有以  
利吾國乎孟子對曰王何必曰利亦有仁義而已  
矣

臣按孟子七篇以仁義為首此造端託始之深  
意也程頤有曰孔子言仁未嘗無義獨於易曰



安宅  
正路

立人之道曰仁與義而孟子言仁必以義配可  
謂有功於聖門矣梁惠一章臣已著之義利篇  
故不悉錄

孟子曰仁人之安宅也義人之正路也曠安宅而  
弗居舍正路而不由哀哉

臣按仁者心之德心存於仁則安反是則危義  
者心之制身由於義則正反是則邪二者皆吾  
所自有而甘心於自棄焉是虛至安之宅而託  
曠蕩之野背至正之路而趨荆棘之塗此聖賢  
之所深哀也

孟子曰人之所以異於禽獸者幾希庶民去之君  
子存之舜明於庶物察於人倫由仁義行非行仁



人之異也

舜明也察人

# 仁義

義也

臣按人之與物相去亦遠矣而孟子以為幾希者蓋人物均有一心然人能存而物不能存所不同者惟此而已人類之中有凡民者亦有是心而不能存是即禽獸也惟君子能存之所以異於物耳若大舜之聖則明乎物之所以為物察乎人之所以為人不待於存而自存蓋存之者猶待於用力舜則身即理理即身渾然無間而不待於用力所謂生知安行從容中道者是也由仁義行則身與理一行仁義則身與理二然未至於舜則所以行仁義者正所當勉也行而久久而熟熟而安則與由而行者亦豈異哉



湯武反之

尚志

居仁由義

不仁

此湯武反之之事有志於學聖人者不可以不勉

王子墊問曰士何事孟子曰尚志曰何謂尚志曰仁義而已矣殺一無罪非仁也非其有而取之非義也居惡在仁是也路惡在義是也居仁由義大人之事備矣

臣按王子墊者必當時國君之子天子諸侯之子其未命者皆曰士觀其所問與孟子所告則其人必有志者也殺一無罪則非仁非其有取之則非義方是時天下之戰國七爭地以戰殺人盈野爭城以戰殺人盈城其戮及無罪者衆矣此不仁之甚也侵人土疆奪人寶貨非其有



不義

仁義  
之充

仁義

而取之者衆矣此不義之甚也然當時之君習  
於為此未必知其為不仁不義也故孟子斥而  
言之使以不仁為戒而所居常在乎仁以不義  
為戒而所由常在於義如此則大人之事備孟  
子此言所以救橫流之禍全生民之命者其功  
豈少哉為人君者當味斯言以自警也

孟子曰人皆有所不忍達之於其所忍仁也人皆  
有所不為達之於其所為義也人能充無欲害人  
之心而仁不可勝用也人能充無欲穿窬之心而  
義不可勝用也人能充無受爾汝之實無所往而  
不為義也

臣按孟子此章教人以善推其所為也夫有所



不忍  
不為

利欲  
無恥

不忍有所不為者此心之正也能即是心而推之雖所忍者亦不忍即仁也雖所為者亦不為即義也如無欲害人此所謂不忍也私欲一動則不忍者有時而忍矣無欲穿窬此所謂不為也私欲一動則不為者有時而為矣惟能即是心而充之害人之事固所不欲其未至於害人者亦皆不欲仁其可勝用乎穿窬之事固所不為其未至於穿窬者亦皆不為義其可勝用乎爾汝人所輕賤之稱知耻者之所不肯受此所謂羞惡之心也能自此充之則無所往而非義也大抵人之本心無不善者由其以利欲汨之而失其本心故侵尋蹉跎遂流於不善如百步



# 仁義智禮樂

之走則知耻之而五十步則不以為耻曷若併  
五十步而無之乎月攘一雞則知耻之歲攘其  
一則不以為耻曷若併歲攘而不為乎知此而  
後知孟子充之之說

以上義  
言仁義

孟子曰仁之實事親是也義之實從兄是也智之  
實知斯二者弗去是也禮之實節文斯二者是也  
樂之實樂斯二者樂則生矣生則惡可已也惡可  
已也則不知足之蹈之手之舞之

臣按此孟子指言仁義知禮樂之實使人知所  
以用力之地也仁義之道大矣而其切實處止  
在於事親從兄蓋二者人之良知良能天性之  
真於焉發見欲為仁義者惟致力乎此而已否



# 仁

尊爵

則悠悠然汎汎然非可擬之實地矣真知斯二者守之而不去則智之實節文斯二者適隆殺之宜則禮之實於斯二者行之而樂有從容安適之意無勉強矯拂之為則樂之實蓋天下之善未有出於事親從兄之外者苟至於樂則方寸之間油然而生意數暢條達自不可已足之所蹈手之所舞亦將有不知其然而然者矣然非深玩而實體之其能識此味乎

樂

此章兼言仁義智禮

孟子曰夫仁天之尊爵也人之安宅也莫之禦而不仁

禦止也

是不智也

朱熹曰仁者天地生物之心得之最先而無統



# 仁

安宅

四者所謂元者善之長也故曰尊爵在人則  
本心全體之德有天理自然之安無人欲陷溺  
之危人當常在其中而不可須臾離也故曰安  
宅

臣按仁者我所自有苟欲為之誰能止者乃  
甘心於不仁豈非不智乎故仁智二者相常  
須焉不仁斯不智矣不智斯不仁矣

孟子曰君子之於物也愛之而弗仁於民也仁之  
而弗親親親而仁民仁民而愛物

物謂禽獸草木  
變物謂取之有

時用之  
有節

臣按天下之理一而分則殊凡生於天壤之間  
者莫非天地之子而吾之同氣者也是之謂理



親、  
仁民、  
愛物

三王異  
楊墨

仁

榮

惡濕而居下也

孟子曰仁則榮不仁則辱今惡辱而居不仁是猶

之道所以異於楊墨也

此章言  
仁之施

一、然親者吾之同體民者吾之同類而物則異  
類矣是之謂分殊以其理一故仁愛之施無不  
徧以其分殊故仁愛之施則有差若以親親之  
道施於民則親疎無以異矣是乃薄其親以仁  
民之道施於物則貴賤無以異矣是乃薄其民  
故於親則親之於民則仁之而於物則愛之合  
而言之則皆仁分而言之則有序此二帝三王

張栻曰仁者非有意於榮仁者固榮也在身則  
心和而氣平德性尊而暴慢遠在家則父子親



仁

仁不仁之  
曰火

辱

兄弟睦夫妻義長幼序推之於國而國治施之於天下而天下平無往而不榮也若夫不仁之人哂理而徇欲一身且不自保況其它乎夫人之情孰不惟辱之惡而自處於不仁則以私欲蔽之而昧夫榮辱之幾故也

孟子曰三代之得天下也以仁其失天下也以不仁國之所以廢興存亡者亦然天子不仁不保四海諸侯不仁不保社稷卿大夫不仁不保宗廟士庶人不仁不保四體今惡死亡而樂不仁是猶惡醉而強酒

臣按孟子此章明白峻厲自天子以至庶人皆當佩服以自警也然所謂不仁者非他縱人欲



商不仁而止  
周以仁而具

以滅天理而已人欲縱而天理滅其禍至於如此可不畏哉

孟子曰詩云商之孫子其麗不億麗數也億十萬也上帝

既命侯于周服言為周之諸侯也侯服于周天命靡常殷

士膚敏裸將于京膚美也敏速也裸將祭事也孔子曰仁不可

為衆也夫國君好仁天下無敵今也欲無敵於天

下而不以仁是猶執熱而不以濯也詩曰誰能執

熱逝不以濯

臣按此大雅文王之詩也以商之孫子而為周

之諸侯以殷之姜士而奔走周廟之祭天命何

常之有哉成湯惟其仁也故天命歸于商紂惟

其不仁故天命轉而歸周商之孫子其數以十



仁

古賢臣諫  
不仁主

不仁

萬計可謂衆矣而不能存商者以周之仁雖身  
無所用也孟子舉此以明國君好仁則天下無  
能敵者歎當時之不然也前後三章而三取喻  
曰惡濕而居下也惡醉而強酒也執熱而不以  
濯也其警世主也深矣

孟子曰不仁者可與言哉安其危而利其菑樂其  
所以亡者不仁而可與言則何亡國敗家之有

臣按自昔危亂之世未嘗無忠言祖伊嘗諫紂  
矣召穆公嘗諫厲王矣李斯嘗諫二世矣而三  
君不之聽者蓋其心既不仁故顛倒迷繆以危  
為安以菑為利以取亡之道為可樂也夫人君  
孰不欲安存而惡危亡而其反易至此者私欲



武帝時

飲不山

德宗所陸贊

不也

民  
桀紂之失

蔽障而失其本心故爾武帝垂老而能聽田千秋故漢不至於亂德宗播遷而能聽陸贄故唐不至於亡信乎不仁而可與言猶可以存其國也雖然亦僅免於亡而已若仁人在上雖居治安之世而樂聞危亂之言是以長治久安而無後患吁此豈武帝德宗之所及哉

孟子曰桀紂之失天下也失其民也失其民者失其心也得天下有道得其民斯得天下矣得其民有道得其心斯得民矣得其心有道所欲與之聚之所惡勿施爾也民之歸仁也猶水之就下獸之走壙也壙野也故為淵歐魚者獮也獮食魚也為叢歐雀者鷙也鷙擊鳥也為湯武歐民者桀與紂也今天



仁

如忠

三王卷  
漢唐

下之君有好仁者則諸侯皆為之國矣雖欲無  
不可得已

臣按此章之要在於所欲與聚所惡勿施之二  
言大學曰民之所好好之民之所惡惡之此之  
謂民之父母父母於子心誠求之所欲者無不  
與所惡者無不去君之於民何獨不然當戰國  
時禽獸其民往往施之以所惡故孟子激切而  
言之夫仁者豈有心於天下之歸已哉水就下  
獸走壙理之自然非有為而為之也故張栻有  
言循天理而無利天下之心而天下歸之者三  
王之所以王也假是道亦以得天下者漢唐是  
也故秦為漢歐者也隋為唐歐者也為人上者



梁惠不仁

其可不鑑于茲

孟子曰不仁哉梁惠王也仁者以其所愛及其所  
不愛不仁者以其所不愛及其所愛公孫丑曰何  
謂也梁惠王以土地之故糜爛其民而戰之大敗  
將復之恐不能勝故驅其所愛子弟以殉之是之  
謂以其所不愛及其所愛也

謂使太子申與齊戰為齊所虜也

臣按人之情孰不愛其所親而梁惠王乃倒置  
若是者以貪得之心勝故天理熄滅人欲橫流  
而至於斯極也朱熹謂仁人之恩自內及外不  
仁之禍自疎及親斯言盡之矣嗚呼梁惠以土  
地之故驅子弟以殉之故孟子譏其不仁後世  
之君有以信讒殺子如漢武帝唐明皇者其

梁惠以貪  
虜子



孟子  
患失教子

仁

雖異其心則同蓋梁惠貪得故驅之以戰而不  
卹二君患失故因讒殺之而不復辨皆由私欲  
之蔽而喪其本心故也孟子之言仁於君道為  
尤切故備著于篇云以仕專  
以上論吾道源流之正

真西山讀書記乙集上大學衍義卷第十二

中興家藏



真西山讀書記乙集上大學衍義卷第十三

格物致知之要一明道

子曰攻乎異端斯害也已金攻專治也如攻

臣按異端之名始見於此謂其非聖人之道而

別為一端也堯舜禹湯文武周公之學君子當

盡心焉若舍此而專治乎異端豈不有害邪或

疑是時異端未作孔子所指未知為誰臣謂老

聃楊朱墨翟皆與孔子同時特以洙泗之教方

明故其說未得肆耳孔子此言必有為而發

公都子曰外人皆稱夫子好辯敢問何也孟子曰

聖王不作諸侯放恣處士橫議楊朱墨翟之言盈

天下天下之言不歸楊則歸墨楊氏為我是無君



# 異端

禹之治水  
周公之驅獸  
孔子之春秋  
孟子之好辯

也墨氏無愛是無父也無父無君是禽獸也公明  
儀曰庖有肥肉廄有肥馬民有饑色野有餓莩是  
率獸而食人也楊墨之道不息孔子之道不著是  
邪說誣民充塞仁義也仁義充塞則率獸食人人  
將相食吾為此懼閑先聖之道閑者防距楊墨猶距  
也放淫辭放驅之也邪說者不得作作於其心害於  
其事作於其事害於其政聖人復起不易吾言矣  
昔者禹抑洪水而天下平周公兼夷狄驅孟獸而  
百姓寧孔子成春秋而亂臣賊子懼詩云戎狄是  
膺荆舒是懲則莫我敢承無父無君是周公所膺  
也我亦欲正人心息邪說距詖行放淫辭以承三  
聖者予豈好辯哉予不得已也故曰能言距楊墨



楊墨疑仁義  
害甚異端之徒

者聖人之徒也

臣按孔子既沒異端遂作至孟子時盛矣以司馬遷所記自騶衍淳于髡田駢之徒各著書言治亂之事以干世主者不可勝數若申不害商鞅輩其害尤甚焉而孟子所深距者惟楊墨二氏何哉程頤嘗論之曰楊墨之害甚於申韓楊氏為我疑於義墨氏兼愛疑於仁申韓則陋而易見故孟子止闢楊墨為其惑世之甚也夫為我之疑於義何也義者任理而無情楊朱自一身之外截然弗卹故其迹似乎義兼愛之疑於仁何也仁者尚恩而主愛墨翟於親疎之間無乎不愛故其迹似乎仁殊不知天下之理本一



# 墨端

楊朱無父  
墨翟無父

正道異端相  
消長

而分則殊故君子親親而仁民仁民而愛物心無不溥而其施有序心無不溥則非為我矣其施有序則非兼愛矣楊朱專於為我則昧乎理之一墨翟一於兼愛則昧乎分之殊若是而曰仁義乃所以賊乎仁義也夫事君則致其身楊朱但知愛身而不知致身之義故無君立愛必自親始墨翟愛無差等而視其至親無異衆人故無父無父無君則人道滅絕是亦禽獸而已大抵正道異端相為消長楊墨之道不息則孔子之道不明孔子之道不明則姦言邪說得以誣罔民聽塞絕正理正理絕滅不惟禽獸食人亦將相食此孟子之所以懼而不容不辯也



禹曰孔救時

孟子能言距楊墨

閑者防閑之義距楊墨放淫辭闢邪說者即所以閑先聖之道也天下之治亂其源實出於人心邪說一溺於其心則發於心而害於事發於事而害於政蓋必然之勢也事者政之目政者事之綱一念差則一事壞一目隳則大綱亦從而隳此邪說所以不可不闢人心所以不可不正也禹抑洪水周公無夷狄驅猛獸孔子作春秋事雖不同而其拯天下之患立生民之極則一孟子之心亦三聖之心也言既終復謂能言距楊墨者即聖人之徒蓋所以勉天下學者皆以闢異端扶正道為心庶幾生人之類不淪胥於禽獸此孟子之功所以不在禹下也



漢武

師異道  
人異論

異端

漢武帝建元元年董仲舒對策曰春秋大一統者

天地之常經古今之通誼也

春秋公羊傳隱元春王正月何言乎王

一月大一統也仲舒蓋借此而

今師異道人異論

百家殊方指意不同是以上亡以持一統法制數  
變下不知所守臣愚以為諸不在六藝之科孔子  
之術者皆絕其道勿使復進邪辟之說滅息然後  
統紀可一而法度可明民知所從矣

臣按此武帝即位之初也是年丞相綰奏所舉

賢良或治申商韓非蘇秦張儀之言亂國政請

皆罷奏可而質之本傳則仲舒實發之申商韓

非皆為刑名之學而秦與儀則為縱橫之學者

也鞅之相秦廢井田而開阡陌以術欺鄰國而



襲破其師刁鋸斧鉞之刑橫加無罪臨渭論囚  
水為之赤其慘覈少恩可知矣申韓之術大抵  
類是而儀秦以辯舌捭闔時君而傾亂人國此  
五人者皆生民之蠹而正道之賊也以其所挾  
往往徼一時富貴故後來之士企而慕之漢初  
游說之士若蒯通朱建輩大抵踵儀秦故轍而  
儒者如賈誼晁錯亦皆明申韓先王之道閭閻  
不明雖通達之士不免沒溺於異學當是時也  
不有仲舒昌言排之道術何自而一乎故先儒  
推論其功以為不在孟子下詎不信然惜武帝  
雖略行其言終不能寘諸丞弼之地使綱紀世  
教而嚴助朱買臣輩以縱橫進張湯杜周之徒



學老子

近理

養生之言

以刑名用晚年巫蠱之禍父子不能相保則一  
江充實為之其人蓋無刀筆口舌之能者也吁  
有天下者可不深監乎此

司馬遷曰

武帝時人作史記

世之學老子者則絀儒學儒

學亦絀老子道不同不相為謀

臣按百家之學惟老氏所該者衆今撫其易知

者言之曰慈曰儉曰不敢為天下先曰無為民

自化好靜民自正無事民自富無欲民自樸無

情民自清此近理之言也曹參以之相漢收寧

壹之效文帝以之治漢成富庶之功雖君子有

取焉曰玄牝之門為天地根綿綿若存用之不

勤此養生之言也而為方士者祖焉曰將欲翕



陰謀之言

放蕩

清談

# 異端

之必固張之將欲奪之必固與之此陰謀之言也范蠡用之以取吳張良本之以滅項而言兵者尚焉曰大道廢有仁義曰失道而後德失德而後仁失仁而後義失義而後禮禮者忠信之薄而亂之首此矯弊之言而放蕩者宗之至其以事物為粗迹以空虛為妙用蒙莊氏因之也以荒唐繆悠之辭譁于世而清談者倣之自其近理者言之固在所可取然皆吾聖人之所有也下乎此則一偏一曲之學其弊有不勝言者養生之說則神仙方藥之所自出也陰謀之術則申商韓非之所本也放蕩之害至劉伶阮籍而甚人皆晉清談之禍至王弼何晏而極人弼魏晏



黃老稱黃帝

鑿師宗神農

巫步祖大禹

文帝用黃老

而安

武帝用儒術

而耗

異端

人皆以惑亂世主斷喪生民雖老莊之學初未  
至此然本源一差其流必有甚焉以是言之曷  
若由堯舜周孔之道為無弊哉或謂自漢以來  
有黃老之稱黃帝亦聖人也其道與老子均乎  
曰此猶鑿師之宗神農巫步之祖大禹非其傳  
之正也或又謂文帝用黃老而天下安武帝用  
儒術而海內耗則儒術果不逮黃老矣曰非也  
清靜慈儉老氏之所長而文帝用之故其效如  
此然亦富之而未及教也使其用孔子之道則  
其成功豈止是哉若武帝之於儒術特崇其名  
而已而所以斃耗生民者則神仙刑名兵家之  
罪儒術何與焉臣不得以不辨



齊

威宣

神

燕昭

秦昭

漢武

少君

漢郊祀志自齊威宣宣王燕昭王使人入海求蓬

萊方丈瀛洲此三神山者其傳在渤海中諸僊人

及不死之藥皆在焉秦始皇至海上方士爭言之

始皇如恐不及使人齎童男女入海求之船交海

中皆以風雨為解曰未能至望見之焉其明年始

皇復游海上後三年游碣石考入海方士後五年

始皇南至湘山遂登會稽竝海上幾遇海中三神

山之奇藥不得還到沙丘崩漢武帝即位尤敬鬼

神之祀李少君以祠竈卻老方見上上尊之少君

常自謂七十能使物卻老善為巧發奇中言上祠

竈皆可致物物謂鬼物而丹砂可化為黃金成以為飲

食器則益壽而海中蓬萊僊者廼可見之以封禪



則不死黃帝是也於是天子始親祠竈遣方士入海求蓬萊而事化丹砂諸藥為黃金矣久之少君病死天子以為化去不死使人受其方而海上燕齊怪迂之方士多言神事矣明年齊人少翁以方見上拜為文成將軍以客禮禮之文成言上即欲與神通宮室被服非象神神不至廼作畫雲氣車又於甘泉宮中為臺室畫天地泰一諸鬼神而置祭具以致天神居歲餘其方益衰神不至廼為帛書以飯牛陽不知言此牛腹中有奇書殺視得書天子識其手謂所書手迹於是誅文成隱之其後又作栢梁銅柱承露僊人掌之屬藥大者故與文成同師求見言方天子既誅文成後悔其方不盡及見



# 異端

公孫卿

藥大大說大為人多方略敢為大言言臣之師曰  
黃金可成不死之藥可得僊人可致廼拜為五利  
將軍居月餘得四印以衛長公主妻之大見數月  
貴震天下而海上燕齊之間莫不搯擊搯與扼同  
自言有禁方能神僊矣齊人公孫卿又言黃帝鑄  
鼎荆山成有龍垂胡顙下迎黃帝後世因名其處  
曰鼎湖於是天子曰嗟乎誠得如黃帝吾視去妻  
子如脫屣耳五利使不敢入海而之泰山祠上使  
人隨驗實無所見五利妄言見其師其方盡多不  
能不驗也無上廼誅五利其冬公孫卿候神河南言  
見僊人迹緱氏城上天子親幸緱氏視迹問卿得  
毋效文成五利乎卿曰僊者非有求人主人主者



# 異端

求之其道非寬暇神不來言神事如迂誕積以歲  
延可致於是郡國各除道繕治宮館名山神祠所  
以望幸矣後上東巡海上行禮祠八神齊人之上  
䟽言神恠竒方者以萬數延益發船令言海中神  
山者數千人求蓬萊神人還至奉高太山名封泰山  
無風雨而方士更言蓬萊諸神若將可得於是上  
欣然庶幾遇之復東至海上望焉復遣方士求神  
人采藥以千數公孫卿言僊人可見上往常遽以  
故不見今陛下可為館如緱氏城依其制度置脯棗神  
人宜可致且僊人好樓居於是上令長安作飛廉  
柱館二館名甘泉作益壽延壽館使卿持節設具而  
候神人延作通天臺置祠具其下將招來神之仙



屬後五年一祠泰山十二歲徧於五嶽四瀆方士  
之候神入海求蓬萊者終無驗公孫卿猶以大人  
之迹為解天子羈縻不絕幾遇其真幾與冀同太始四  
年上耕于鉅定還幸泰山脩封禪祀明堂見羣臣  
乃曰朕即位以來所為狂悖使天下勞苦不可追  
悔自今事有害百姓糜費天下者悉罷之田千秋  
曰方士言神仙者甚衆而無顯功請皆罷斥遣之  
上曰大鴻臚言是也於是悉罷諸方士候神人者  
是後上每對羣臣自歎鄉時愚惑為方士所欺天  
下豈有仙人盡妖妄耳節食服藥差可少病而已  
臣按神仙之說自戰國始燕齊之君嘗求之不  
驗矣而秦皇帝復求之秦皇帝求之不驗矣而



谷永諫  
成帝好鬼神

漢孝武復求之以孝武之高明英傑而長生不死之欲一動乎中遂為方士所愚惑猶玩嬰兒於股掌之上豈不異哉晚更巫蠱之變壯心摧落悔志始萌乃知平日所為無非狂悖而以方士為妖妄盡斥罷之是時年幾七十矣海內已虛耗矣乃始自咎其非不亦晚乎然迷而能復猶賢於始皇之終不悟云

成帝末年頗好鬼神上書言方術者皆得待詔谷永說上曰臣聞明於天地之性不可惑以神恠知萬物之情不可罔以非類諸背仁義之正道不遵五經之法言而盛稱奇恠鬼神廣祭祀之方求報無福之祠及言世有僊人服食不終之藥者皆姦



# 異端

物無恒存  
人無長生

人惑衆挾左道懷詐偽以欺罔世主聽其言洋洋  
滿耳若將可遇求之盪盪如係風捕景終不可得  
是以明王距而不聽聖人絕而不語唯陛下距絕  
此類毋令姦人有以窺朝者上善其言

臣按谷永此疏足以盡方士欺詭之情矣使武  
帝時有為斯言者或可以開帝意之惑乎然則  
永所謂天地之性萬物之情者何也曰天地雖  
大萬物雖多其所不能違者陰陽而已故春夏  
不能常春夏而有秋冬焉旦晝不能常旦晝而  
有莫夜焉闔闢之循環往來之更代此天地之  
性也榮必易之以悴盛必繼之以衰有終則有  
始有殺則有生者萬物之情也天地以體言故



漢光  
信識

曰性萬物以用言故曰情人在天地間是亦一  
物耳而為神僊之學者則曰吾能長生而不死  
有是理乎善乎揚雄之說也或問人言仙者有  
諸曰吾聞宓犧神農歿黃帝堯舜殂落而死文  
王畢畢地名文王所葬孔子魯城之北孔子葬處獨子愛其  
死乎非人之所及也合永與雄之說則知長生  
之為虛誕也明矣而後來者猶甘心而不悟哀  
哉

漢光武信識多以決定嫌疑議郎桓譚上疏曰凡  
人情忽於見事而貴於異聞觀先王之所記述咸  
以仁義正道為本非有奇恠虛誕之事今諸巧慧  
小才伎數之人增益圖書矯稱識記

圖書謂識緯  
符命之類



# 異端

以欺惑貪邪、誑誤人主，焉可不抑遠之哉！且垂明聽，發聖意，屏羣小之曲說，述五經之正義，帝不悅。其後有詔會議靈臺，所處帝曰：「吾欲讖決之，何如？」譚嘿然良久，曰：「臣不讀讖。」帝問其故，譚復極言讖之非經。帝大怒，曰：「桓譚非聖，無法，將下斬之。」良久乃解。

臣按光武之中興，其先有以赤伏符來上者，伏赤

符者圖帝於是篤信之，始以之命三公，又以之

定郊祀，終以之斷封禪，焉不知六經者先王之

格言，而讖緯者末世之邪說。張衡以為起於哀

平之間，蓋得之矣。新莽之居攝也，假稱符命，以

惑衆聽，因以行其篡竊之謀。光武誅新，復漢，且

張衡之邪  
起於哀平

符命



歐陽救之

漢明  
永公

削滅其書以絕禍本可也乃以赤伏之驗崇信  
而表章之夫異端小數豈無或驗要非六經之  
法言先王之正道故劉歆見之而改名公孫述  
因之而僭畔是徒足以啓亂臣賊子之心而已  
果何益於世教哉自光武好之而東都儒者鮮  
不傳習至引之以釋經謬妄為甚後之為正義  
者復祖焉故先朝名臣歐陽脩乞詔儒臣悉取  
九經之疏刪去讖緯之文以其害道故也  
聖明之君有志於扶持正道者誠取脩言施行  
之則所益多矣

初明帝

顯宗也

聞西域有神其名曰佛因遣使之天

竺求其道得其書及沙門以來其書大抵以虛無



# 異端

為宗貴慈悲不殺以為人死精神不滅隨復受形  
生時所行善惡皆有報應故所貴修鍊精神以至  
為佛善為宏闊勝大之言以勸誘愚俗精於其道  
者號曰沙門於是中國始傳其術圖其形像而王  
公貴人獨楚王英最先好之

臣按此佛法入中國之始也是時所得者佛經  
四十二章緘之蘭臺石室而已所得之像繪之  
清涼臺顯節陵而已楚王英雖好之然不過潔  
齋修祀而已英尋以罪誅不聞福利之報其後  
靈帝始立祠於宮中魏晉以後其法寢盛而五  
胡之君若石勒之於佛圖澄苻堅之於沙門道  
安姚興之於鳩摩羅什徃徃尊以師禮元魏孝



魏主時  
尚虛無

景元中  
竹林七賢

文號為賢主亦幸其寺修齋聽講自是至于蕭  
梁其盛極矣而其源則自永平始非明帝之責  
而誰哉

魏正始中尚書何晏好老莊書與夏侯玄荀粲王  
弼之徒競為清談祖尚虛無謂六經為聖人之糟  
粕由是天下士大夫慕效遂成風流不可復制

正始

魏主曹芳年號是時司馬懿專國晏蓋曹爽之黨

景元中

常道鄉公年號

中散大夫嵇康好言老莊與阮籍

籍兄子咸山濤向秀王戎劉伶相友善號竹林七

賢皆崇尚虛無輕蔑禮法縱酒昏酣遺落世事籍  
居喪飲酒無異平日當時士大夫爭慕效之謂之

放達

未幾魏禪于晉



晉武

異端

晉元

晉武帝太康中王戎為司徒王衍為尚書令樂廣為河南尹皆善清談宅心事外朝野爭慕效之衍與弟澄好題品人物澄及阮咸謝鯤畢卓等皆以任放為達醉狂裸體不以為非初何晏等祖述老莊立論以為天地萬物皆以無為本無也者開物成務無往不存者也衍等愛重之由是士大夫皆尚浮誕廢職業裴頠著崇有論以釋其蔽然習俗已成亦不能救

未幾惠帝立晉室大亂  
劉聰石勤遂據中原

元帝渡江初王導為政陳頤遺導書曰中華所以傾覆者正以莊老之俗傾惑朝廷養望者為弘雅政事者為俗人今宜改張然後中興可冀導不能從



晉

王何罪  
集討

梁簡文  
講老子

庾亮鎮武昌辟殷浩為記室浩與褚裒杜乂皆以  
識度清遠善談老易擅名江東而浩尤為風流所  
宗

孝武帝時豫章太守范甯嘗謂王弼何晏之罪深  
於桀紂或以為貶之太過甯曰王何蔑棄典文幽  
淪仁義游辭浮說波蕩後生使搢紳之徒翻然改  
轍以至禮壞樂崩中原傾覆遺風餘俗至今為患  
桀紂縱暴一時適足以喪身覆國為後世戒豈能  
迴百姓之視聽哉故吾以為一世之禍輕歷代之  
患重自喪之惡小迷衆之罪大也

梁簡文帝為太子時講老子於華林園詹事何敬  
容歎曰西晉尚清虛使中原淪於胡羯今東宮復



# 異端

老氏之無

無妄之世

爾江南其為戎乎

未幾侯景作亂武帝餓死簡文帝殞

臣按清談之弊起於曹魏而終於蕭梁其始蓋

宗老莊氏其末則有欲為老莊氏之役而不可得者彼徒見老氏謂有生於無也故何晏王弼之徒說為玄虛之論視事物之有形者皆為芻狗是非成壞一不足介意於是臣不必忠子不必孝禮法不必事威儀不必修惟空曠無心不為事物染著者乃為知道固非先王之教之所許而於老氏本指亦莫之究焉蓋老氏謂天下之物生於有而有生於無是始無而今有也何晏輩乃悉歸之於無是豈老氏本指邪自吾儒言之形而上者理也形而下者物也有是理故



吾道之  
實

高談之輩  
皆寵利

有是物有是物則具是理二者未嘗相離也方  
其未有物也若可謂無矣而理已具焉其得謂  
之無邪老氏之論既失之而為清談者又失之  
尤者也若吾儒之道則不然天之生物無一之  
非實理之在人亦無一之非實故立心以實意  
為主修身以實踐為貴講學以實見為是行事  
以實用為功此堯舜周孔相傳之正法也自何  
晏戎衍以至殷浩雖皆高談空妙然於世之名  
寵權利未嘗不深留其情晏圖台鼎戎執牙籌  
衍營三窟浩達空函卑猥貪吝更甚庸俗不知  
晏輩其以名寵權利為有邪為無邪夫既酷嗜  
而深求之是必以為有矣夫何世間萬有一切



欲老莊  
石口

# 異端

晉果皆止

皆無獨此乃真有邪其視老氏之無為無欲超  
然萬物之表莊生於千金之聘三公之位若浼  
焉者果如何邪此所謂欲為老莊氏之役而不  
可得者也其始以之自利其身其終以之貽害  
於國故桓溫以為神州陸沉百年丘墟王夷甫  
諸人不得不任其責夷甫字而陶洪景之詩有曰  
平叔任散誕平叔字夷甫坐談空不悟昭陽殿化  
作單于宮而何敬容亦有江南為戎之歎蓋自  
晉及梁其亂亡如出一轍皆學老莊氏而失之  
罪推原其本是亦老莊之罪也然則有天下者  
懲魏晉蕭梁之禍其可不以堯舜周孔之道為  
師哉



魏世祖  
信神術

寇謙之

崔浩

作靜輪宮  
太子諫

後魏世祖時道士寇謙之自言嘗遇老子授以辟穀輕身之術又遇神人李君授以圖籙真經使之輔佐北方太平真君出天宮靜輪之法其中數篇李君手筆也謙之獻於魏主朝野多未信崔浩獨師事之崔浩魏大臣也上書證明其事曰聖主受命必有天應河圖洛書皆寄言於蟲獸之文未若今日神人接對手筆粲然辭旨深妙自古無比魏主遂信之顯揚新法宣布天下

寇謙之奏作靜輪宮必令其高不聞雞犬以上接天神崔浩勸魏主從之功費萬計經年不成太子是諫曰天人道殊卑高分定不可相接理在必然今虛耗民力將安用之必不得已請因東山萬仞



# 異端

之高庶為功差易魏主不從魏主幾崔浩以事坐誅

臣按魏壽夷狄之君其為異教所惑不足責也崔浩名為研精經術不喜老佛而乃怵於一道士之言以詭妄為可信是又出於老佛之下矣先儒胡寅嘗論之曰浩言河圖洛書寄言於蟲獸之文夫圖書之顯乃天地之理自然發見如垂象然非有寄言者也又言神人接對手書絜然辭旨深妙此又理之所必無者也神無聲色貌象曷為其能書耶至於信謙之之說作宮以上接天神尤為愚誕夫天非若地之有形也自地而上無非天者日月星辰之繫乎天非若草



# 異端

木山川之麗乎地也著明森列躔度行止皆氣  
機自運莫使之然而然者無所託也若其有託  
則是以形相屬一麗乎形能不壞乎神也者妙  
萬物而為言謂造化之跡盈虛消息而不可測  
者也或者惑於荒幻之言乃謂或聆其音旨或  
覩其儀觀或受其詔告符契寧有是哉臣謂胡  
寅之論善矣然則人主之事天果何道乎詩曰  
上帝臨女無貳爾心又曰無貳無虞上帝臨女  
夫無貳者一也主一者敬而能一者誠也湯之  
所以事天曰顧諟明命爾文王之所以事天曰  
翼翼小心爾夫豈求之外哉人主知此則土木  
不必崇儀物不必侈凜然自持常若對越則不



梁武  
行清靜

專精佛戒  
子弟多驕

待聆音旨睹儀觀受符契而游行出王無非與  
神明周旋者矣

梁武帝中大通元年九月幸同泰寺設四部無遮  
大會釋御服持法衣行清靜大捨羣臣以錢一億  
萬祈白三寶奉贖皇帝菩薩僧衆默許乃還內  
上自天監中用釋氏法長齋斷肉日止一食惟菜  
羹糲飯而已多造塔公私費損時王侯子弟多驕  
淫不法上年老厭於萬機又專精佛戒每斷重罪  
則終日不懌或謀反逆事覺亦泣而宥之由是王  
侯益橫或白晝殺人於都街或暮夜公行剽掠有  
罪亡命匿於王家有司不敢搜捕上深知其弊而  
溺於慈愛不能禁也



孝寺講經  
浮圖為災

推廣公戒

中大同元年三月庚戌上幸同泰寺遂停寺省講  
三慧經夏四月丙戌解講是夜同泰寺浮圖災上  
曰此魔也宜廣為法事乃下詔曰道高魔盛行善  
鄭生當窮茲土木倍增往日遂起十二層浮圖將  
成值侯景亂而止

明年侯景舉河南來歸又明年景反陷臺城上以餓殂

臣按魏晉以後人主之事佛未有如梁武之盛  
者也夫以萬乘之尊而自捨身為佛之厮役  
其可謂卑佞之極矣殫國府藏腋民膏血以營  
塔廟又可謂尊奉之極矣以疏茹麵食而易宗  
廟之牲牢恐其有累冥道也織官文錦有為人  
類禽獸之形者亦禁之恐其裁翦有乖仁恕也  
臣下雖謀反逆赦而不誅剽盜肆行亦弗忍禁



# 異端

漢書  
梁武帝

凡以推廣佛戒也。蓋嘗論之。使仙而可求。則漢武得之矣。佛而可求。則梁武得之矣。以二君而無得焉。則知其不可求而得也。明矣。縱求而得之。戎夷荒幻之教。不可以治華夏。山林枯槁之行。不可以治國家。況不可求邪。漢武貪仙而終致虛耗之禍。梁武佞佛而卒召危亡之厄。則貪佞之無補也。又明矣。且其舍身事佛。豈非厭塵囂而樂空寂乎。使其能若迦維之嫡嗣。視王位如弊屣。褰裳而去之。庶乎為真學佛者。釋迦維王之嫡嗣。舍王位而入山學佛。而帝也。既以篡弑取人之國。又以攻伐侵人之境。及其老也。雖慈孝如太子。統一涉疑似忌之。而至死貪戀如此。又豈真能捨



者乎釋服入道既可徵浮屠之福奉金贖還又  
 不失天子之貴是名雖佞佛而實以誑佛也且  
 其織文之非實猶不忍戕之彼蚩蚩之氓性命  
 豈鳥獸比而連年征伐所殺不可勝計浮山築  
 堰浸灌敵境舉數十萬衆而魚鱉之曾不少邱  
 是名雖小仁而實則大不仁也且國所與立惟  
 綱與常帝於諸子皆任以藩維而無禮義之訓  
 故正德以梟獍之資始舍父而奔敵國終引賊  
 以覆宗祊武帝未生太子統時養臨川王宏子  
正德為子及統生正德還本封西豐  
侯意怏怏遂奔魏已而逃歸復其封爵後進王  
臨賀侯景反正德首為內應導之以犯關又  
景約克城之日母行全兩若綸若繹或搃雄師  
宮兩宮謂帝及太子綱也或鎮上游當君父在難不聞有灑血投袂之意



# 異端

代宗  
信仙

邵陵王綸督諸軍討侯景不力戰湘東方且弟

王繹鎮江陵不時遣援致陷都城

兄相仇叔姪交兵極人倫之惡相武陵王紀與繹皆湘東之姪也其後警引魏兵殺繹於江陵

此無他帝之所學者釋氏也釋氏以天倫為假

合故臣不君其君子不父其父三四十十年之間

風俗淪胥綱常埽地且其致此極也使其以堯

舜三王為師而不雜以方外之教必本仁義必

尚禮法必明政刑顧安有是哉

唐代宗始未甚重佛宰相元載王縉皆好佛縉尤

甚上嘗問佛言報應果有之邪載等對曰國家運

祚靈長非宿植福業何以致之福業已定雖時有

小災終不能為害所以安史皆有子禍懷恩出門



病死二虜不戰而退此皆非人力所及豈得言無  
報應也上由是深信之常於禁中飯僧百餘人有  
寇至則令僧講仁王經以禳之寇去則厚加賞賜  
良田美利多歸僧寺載等侍上多談佛事政刑日  
紊矣

臣按代宗以報應為問使其時有儒者在相位  
必以福善禍淫虧盈益謙之理反復啓告使人  
主凜然知天道之不可誣而自強於脩德載等  
曾微一語及此乃以宿植福業為言而謂國祚  
靈長皆佛之力毋乃厚誣天道乎夫唐之所以  
歷年者以太宗濟世安民之功不可掩也而所  
以多難者以其得天下也不純乎仁義綱常禮



# 異端

法所在有慙德焉繼世之君克己屬善者少恣情悖理者多也天有顯道厥類惟彰此之謂矣載等舍天道而談佛果是謂災祥之降不在天而在佛也為治之道不在脩德而在於奉佛也代宗惟其不學故載等得以惑之且夫安史之禍由太真蠱於內楊李賊於外醞釀而成之也而所以能平之者由子儀光弼諸人盡忠帝室驅而攘之也其所以皆有子禍者祿山思明以臣叛君故慶緒朝義以子弑父此天道之所以類應者也回紇吐蕃不戰自退則又子儀挺身見虜設謀反間之力推迹本末皆由人事而載等乃曰此非人力所及其欺且誣顧不甚哉方

李藩  
憲宗  
仙

是時子儀以屢立大功為大閹魚朝恩所忌載  
等以卻敵歸之佛力既足以排子儀又足以媚  
朝恩姦邪情狀豈不灼然而代宗弗之察也寇  
至則飯僧講經以懷之寇退則厚加賞賚移爪  
牙之功歸髡髻之輩其不激將士之怒而速危  
亡之厄直幸而已爾其後我  
朝舉兵南伐虜王李煜亦祖是轍楚唄未終而  
城堞不守矣吁是豈不足為千載之戒哉

唐憲宗與宰相語及神仙李藩對曰秦皇漢武學  
仙之效具載前史太宗服天竺僧長年藥致疾此  
古今明戒也陛下春秋鼎盛勵志太平宜拒絕方  
士之說苟道盛德充人安國理何憂無堯舜之壽



柳泌以朱

藥為白州刺

# 異端

裴潏諫

乎時元和五年間元和十三年以山人柳泌為台州刺史。上好神仙，詔天下求方士。皇甫鏐薦泌能合長生藥。泌言：「天台多靈藥，誠得為彼長吏，庶幾可求。」上以命泌，諫官論奏，以為人主喜方士，未有使之臨民者。上曰：「煩一州之力而能為人主致長生，臣子亦何愛焉？」由是羣臣莫敢言。泌至台州，驅吏民采藥，歲餘無所得，逃入山中。浙東觀察使捕送京師。皇甫鏐等保護之上，復使待詔翰林，服其藥，日加躁渴，起居舍人裴潏上言：「藥以愈疾，非朝夕常餌之物。況金石酷烈有毒，又益以火氣，殆非五藏所能勝也。古者君飲藥，臣先嘗之，乞令餌藥者先餌一年，則真偽可辨矣。」上怒貶潏為江陵令。上服

敬宗  
武宣

憲宗

山骨

金丹多躁怒左右宦官往往獲罪有死者人人自危十五年正月暴崩人謂內侍陳弘志弑逆

臣按李藩之對裴潏之諫皆忠言至論也憲宗一不之察而卒服金丹以殞其身自古人主為藥所誤者多矣臣獨舉憲宗者以其英明之主不應惑而惑故深惜之也自是而後以藥致疾者又三君敬宗昏童無足譏者武宣皆英主亦復為之覆轍相尋而不知鑒母乃惑之甚蔽之甚乎

元和十四年迎佛骨至京師先是功德使上言鳳翔寺塔有佛指骨相傳三十年一開開則歲豐人安來年應開請迎之上從其言至是佛骨至京師



韓愈上表

# 異端

留禁中三日歷送諸寺王公士民瞻奉捨施如恐  
弗及刑部侍郎韓愈上表諫曰佛者夷狄之一法  
耳自黃帝至禹湯文武皆享壽考百姓安樂當是  
時未有佛也漢明帝時始有佛法其後亂亡相繼  
運祚不長宋齊梁陳元魏已下事佛漸謹年代尤  
促唯梁武在位四十八年前後三捨身竟為侯景  
所逼餓死臺城事佛求福乃更得禍由此觀之佛  
不足信亦可知矣佛本夷狄之人與中國言語不  
通衣服殊製不知君臣之義父子之情假如其身  
尚在來朝京師陛下容而接之不過宣政一見禮  
賓一設賜衣一襲衛而出之不令惑衆也況其身  
死已久枯朽之骨豈宜以入宮禁乞付有司投諸

水火永絕禍本上大怒將加極刑宰相裴度崔羣  
言愈雖狂發於忠懇宜寬容以開言路乃貶潮州  
刺史

臣按後世人主之事佛者大抵徼福田利益之  
報所謂以利心而為之者也故韓愈之諫歷陳  
古先帝王之時未有佛而壽考後之人主事佛  
而夭促可謂深切著明者矣而憲宗弗之悟也  
方是時既餌金丹又迎佛骨求仙媚佛二者交  
舉曾未暮年而其效乃爾福報果安在邪臣故  
併著之以為人主溺意仙佛者之戒

愈又嘗著原道篇略曰凡吾所謂道德云者合仁  
與義言之也天下之公言也老子所謂道德云者



# 異端

去仁與義言之也一人之私言也又曰古之為民  
者四士農工賈今之為民者六四民之外又有釋老農之家一而  
食粟之家六工之家一而用器之家六賈之家一  
而資焉之家六柰之何民不窮且盜也又曰古之  
所謂正心誠意者將以有為也今也欲治其心而  
外天下國家滅其天常子焉而不父其父臣焉而  
不君其君民焉而不事其事又曰孔子之作春秋  
也諸侯用夷禮則夷之夷而進於中國則中國之  
今也舉夷狄之法而加之先王之教之上幾何其  
不胥而為夷也又曰夫所謂先王之教者何也博  
愛之謂仁行而宜之之謂義由是而之焉之謂道  
是乎已無待於外之謂德其文詩書易春秋其法

禮樂刑政其民士農工賈其位君臣父子師友賓  
主昆弟夫婦其服絲麻其居宮室其食粟米蔬棗  
魚肉其為道易明而為教易行也是故以之為己  
則順而祥以之為人則愛而公以之為心則和而  
平以之為天下國家無所處而不當是故生則得  
其情死則盡其常郊焉而天神假廟焉而人鬼饗  
曰斯道何道也曰斯吾所謂道也非向所謂老與  
佛之道也堯以是傳之舜舜以是傳之禹禹以是  
傳之湯湯以是傳之文武周公文武周公傳之孔  
子孔子傳之孟軻軻之死不得其傳焉荀與揚也  
擇焉而不精語焉而不詳

臣按韓愈之書深排釋老可謂有功於衛道者



# 異端

釋言聖賢  
相傳之道

中誠仁義

一道

故劉其略著于篇然愈所謂堯傳之舜舜傳之禹至于孟子沒而不得其傳者亦言其槩耳而所以相傳者則未之詳也然則所以相傳者果何道邪曰堯舜禹湯之中孔子顏子之仁曾子之忠恕子思之中之誠孟子之仁義此所謂相傳之道也知吾聖賢相傳之正則彼異端之失可不辯而明矣然此數者之中曰中曰仁曰誠皆道之全體是三者果一乎果二乎臣嘗論之中也者以其天理之正而無所偏倚也仁也者以其天理之公而不蔽於私欲也誠也者以其天理之實而不雜以偽妄也雖所從言者不同而其道則一而已爾虞書言中而不及仁論語

異端與吾  
道不同

言仁而不及誠夫豈偏於一哉中則無不仁仁  
則無不誠矣彼高而溺於空虛卑而陷於功利  
者焉有所謂中慘覈刻薄者焉有所謂仁欺詭  
譎誕者焉有所謂誠以此揆彼所謂夷夏之分  
霄壤之隔也人主於二者之辨其可不明也哉  
以上論異端學術之差

真西山讀書記乙集上大學衍義卷第十三



霸術

易牛 齋宣以羊

真西山讀書記乙集上大學衍義卷第十四

格物致知之要一明道術

齊宣王

齊國名宣王也諸侯稱王

問曰齊桓晉文之事

齊桓公名小白

晉文公名重耳春秋時霸者

可得聞乎孟子對曰仲尼之徒無

道桓文之事者是以後世無傳焉無以則王乎王

行王者也曰德何如則可以王矣曰保民而王莫之

能禦也也曰若寡人者可以保民乎哉曰可曰

何由知吾可也曰臣聞之胡斲曰王坐於堂上有

牽牛而過堂下者王見之曰牛何之對曰將以釁

鍾新鍾成殺牲以血塗其卻曰釁王曰舍之吾不忍其觶觫牛恐懼之

若無罪而就死地曰然則廢釁鍾與曰何可廢

也以羊易之不識有諸曰有之曰是心足以王矣

# 王伯之異

仁術

百姓皆以王為愛也愛也財也臣固知王之不忍也王

曰然誠有百姓者實有知百齊國雖褊小吾何愛

一牛即不忍其骸骸若無罪而就死地故以羊易

之也曰王無異於百姓之以王為愛也以小易大

羊小彼惡知之愚者言民王若隱其無罪而就

死地隱痛則牛羊何擇焉王笑曰是誠何心哉我

非愛其財而易之以羊也宜乎百姓之謂我愛也

曰無傷也是乃仁術也見牛未見羊也君子之於

禽獸也見其生不忍見其死聞其聲不忍食其肉

是以君子遠庖厨也王說曰說喜詩云他人有心

予忖度之詩小雅夫子之謂也夫我乃行之反而

求之不得吾心夫子言之於我心有戚戚焉戚戚心動



貌此心之所以合於王者何也曰有復於王者曰  
吾力是以舉百鈞三十斤而不足以舉一羽明是  
以察秋毫之末毫至秋銳而不見輿薪以車載薪則王許  
之乎曰否今恩足以及禽獸而功不至於百姓者  
獨何與然則一羽之不舉為不用力焉輿薪之不  
見為不用明焉百姓之不見保為不用恩焉故王  
之不王旺音不為也非不能也老吾老以及人之老  
幼吾幼以及人之幼吾老我之父兄我幼我之兄弟天下可運於  
掌詩云刑于寡妻至于兄弟以御于家邦言舉斯  
心加諸彼而已故推恩足以保四海不推恩無以  
保妻子古之人所以大過人者無他焉善推其所  
為而已矣今王發政施仁使天下仕者皆欲立於

# 王伯之異

王之朝耕者皆欲耕於王之野商賈皆欲藏於王之市行旅皆欲出於王之塗天下之欲疾其君者

疾惡也

皆欲赴愬於王

愬與同

其若是孰能禦之

臣

按五霸桓文為盛

五霸者齊桓晉文秦穆楚莊宋襄皆春秋列國之君

而霸於諸侯者也

故宣王欲聞其事也孟子直謂仲尼

之徒無道之者所以深沮宣王羨慕霸功之志

而欲其進於王道也世以王道為甚高而難行

孟子斷之以一言曰保民而王保云者愛護育

養之意書所謂若保赤子是也王道不外乎保

民而保民又不外乎此心即宣王愛牛不忍殺

之心知其可以保民無難也或者見宣王以羊

易牛謂其出於貪吝而孟子獨曰是心足以王



矣所以警覺宣王使知只此一心便足以王天下其所指示亦精切矣而宣王猶不悟本心之所以然也於是孟子復曰無傷也是乃仁術也是又警覺宣王使知前日以羊易牛是乃行仁之術術謂法之巧者蓋處事不可無法雖有此心而無法以處之則亦徒善而已朱熹謂人與禽獸同生而異類故用之以禮而不忍之心施於見聞之所及其所以遠庖厨者亦以預養此心而廣為仁之術也宣王聞此乃始悅孟子之知其心而亦未知王道之不外乎是也孟子復為一羽輿薪之譬以明愛物之難而仁民之易宣王既能為其所難乃不能為其所易何哉善

# 王伯之異

乎張栻之說曰方其見牛而不忍者無以蔽之  
愛物之端發見也其不能推恩於民者有以蔽  
之而仁民之理不著也斯言也足以中宣王之  
病矣老老幼幼而下則告宣王以行仁之序也  
聖人之視天下莫不欲歸吾仁而其行則自近  
始故親親而仁民仁民而愛物其序不可紊也  
敬吾父兄慈吾子弟所謂親親也推之以及人  
之父兄子弟所謂仁民也由是達之於天下雖  
昆蟲草木無不被其澤者不過舉此之心加諸  
彼而已推恩足以保四海此心流行雖遠必暨  
也不推恩無以保妻子此心壅遏雖近不周也  
由親以及民由民以及物此古人之善推也能



管子  
仲晏  
子之切

及物而不能及民此宣王之不善推也發政施仁而下則告宣王以保民之實也其目不過於任賢使士樂仕於朝薄其賦歛使農樂耕于野寬其征稅使商賈樂藏於市行旅樂出於塗所謂王道者蓋如此豈有甚高難行者哉惜宣王之終不悟也

公孫丑

孟子弟子

問曰夫子當路於齊

夫子謂孟子也當路謂為卿相

行國政也

管仲

齊桓公相

晏子

名嬰齊景公相

之功可復許乎孟子

對曰子誠齊人也知管仲晏子而已矣或問乎曾

西

曾參之子

曰吾子與子路孰賢

仲由字子路孔子弟子

曾西蹴

然

貌不安

曰吾先子之所畏也

先子謂曾參也

曰然則吾子

與管仲孰賢曾西蹵然不悅曰爾何曾比予於管

# 王伯之異

管子  
子修

仲

會則也

管仲得君如彼其專也行乎國政如彼其

久也功烈如彼其卑也爾何曾比予於是曰管仲

曾西之所不為也而子為我顧之乎曰管仲以其

君霸晏子以其君顯管仲晏子猶不足為與曰

孟子

以齊王

旺音

猶反手也

臣

按齊宣王既慕桓文而公孫丑復慕管晏盖

霸者功利之說深入人心為日已久故不惟時

君慕之而學者亦慕之也孟子引曾西之言以

折之盖子路雖不及有為而其所學固聖賢之

大學也若管仲之已試則桓公專任之四十餘

年其所成就不過國富兵彊而已此孔氏之門

所羞稱者故雖曾西不屑為之況孟子以承三



聖自任其肯與之匹乎先儒楊時有曰孔子言  
子路之才曰千乘之國可使治其賦也使其見  
於施為如是而已其於九合諸侯一匡天下固  
有所不逮也然則曾西推尊子路而羞比管仲  
者何哉譬之御者子路則範我馳驅而不獲者  
也管仲之功詭遇而獲禽爾斯言盡之使孟子  
當路于齊則必行王者之道其以齊王信猶反  
掌之易也或謂晏子於齊固無功烈之是言若  
管仲者孔子蓋嘗以知其仁稱之孟子學於孔  
子者也何其言之異耶曰孔子之稱稱其攘夷  
狄而尊中夏也孟子所譏譏其舍王道而用霸  
術也所指固不同矣然孔子雖稱其功而器小

以力假仁  
以德行仁

王伯

之異

之譏不知禮之譏固未嘗略況世變日下使孟子而不復議其舍王用霸之罪則人將靡然趨於霸矣波流滔滔孰從而返之邪以此坊民商鞅申不害之流猶以詐力彊國而甘處於霸之下者

孟子曰以力假仁者霸霸必有大國以德行仁者王王不待大湯以七十里文王以百里以力服人者非心服也力不贍也以德服人者中心悅而誠服也如七十子之服孔子也詩云自西自東自南自北無思不服此之謂也

臣按先儒謂自古之論王霸者多矣未有如此章之深切著明也蓋王霸之辨曰德與力而已



力者國富兵彊之謂初無心於為仁而借其名  
以集事也德者躬行心得之謂其仁素具於中  
而推之以及物也霸者以力故必大國乃能為  
之王者以德不以力何待於大乎以力服人者  
有意於服人而人不敢不服以德服人者無意  
於服人而人不能不服此天理人欲之分而王  
霸之所以異也夫孔子以匹夫不得位而七十  
子終身從之是孰使之然哉所謂心悅而誠服  
也王者之服人亦猶是也以春秋攷之齊桓之  
伐衛若尊王也而心則在於取賂莊二十七年  
王使召伯廖  
賜齊侯命且請伐衛賜齊侯命且請伐衛  
以其立子頹也其省難  
十八年齊侯伐衛戰敗衛師取賂而還  
於魯若卹鄰也而心則在於覘國閔元年齊仲  
孫湫來省難

以力服

心不服

# 王伯之異

仲孫歸公曰魯可取乎仲孫曰不可先儒譏就其使計謀之士窺覘虛實有乘亂取國之心

其名義之最正者如救邢封衛之舉人救邢

二年城首止葵丘之盟止以定世子之位九年

諸侯會盟然其心則欲仗義以服諸侯而成已

之霸若此之類皆所謂假仁者也其於小國則

滅譚莊十年滅遂十三年降鄭三十一年鄭紀附庸也遷陽閔二年

偏而遷之是皆以力服之也然遂既滅矣而亡

國遺民猶能殲其師齊人滅遂而戌之十七年

領氏工婁氏須遂氏則人之不心服可知矣至

於大國則於楚也雖仗諸侯之衆執王祭之名

能使其受盟於召陵信四年公會齊侯宋公陳

蔡蔡潰遂伐楚次于堅楚屈完來盟于師盟于召陵傳稱其責楚之詞曰爾貢包茅不入王祭



力不及則不服

桓西衰

後人呼告  
不果

不共無以縮酒對曰貢之不  
入寡君之罪也敢不共給  
國之黃又從而滅之齊卒不能救也既又伐吾

與國之徐齊雖救之終莫止其敗也  
十一年楚

二年楚滅黃十五年楚人伐徐  
諸侯救徐楚人敗徐於婁林其於晉也未嘗

能使之與會盟盖嘗取虢與虞矣不聞其以

滅同姓問之也  
五年又嘗殺太子申生矣不聞

其以易嫡子正之也  
五年葵丘之盟將來會而還

亦不聞其致詰之也  
九年盖其力之所至則可

以服之力之所不及則無以服之矣迨其末年

城緣陵而散  
十四年諸侯城緣陵城鄆而不

果  
僖十六年城鄆役人病有夜登狄侵衛又侵

鄭  
僖十四年侵鄭而不能遏魯滅項雖討其罪

易服無服

齊師敗

晉文公

# 王伯之異

而不能終是雖易服者亦無以服之矣

僖十七年魯成

取齊人以爲詞而止公聲姜以公故會齊侯于十公至自會

又其甚也身沒

未幾而曹衛邾之師已見戕矣

僖十七年十二月齊侯小白卒

十八年正月宋公曹伯衛人邾人伐齊五月宋師及齊師戰于鹹齊師敗績

若晉文

之譎其視齊桓之正又不逮焉本無義也而假

一事示之義本無信也而假一事示之信本無

禮也而假一事示之禮

晉侯始入而教其民二

知義未安其居於是乎出定襄王入務利民懷生矣制用之

是乎伐原而示之信民易資者不求豐焉明共其辭公曰可矣乎子犯曰民未去禮未生其共

於示之禮曰示云者表而揚之以夸衆也故

一朝王之頃而遽請隧焉

僖十四年王蒙塵于外二

十五年狐偃言於晉侯曰求諸侯莫如勤王遂殺大叔定襄王請隧弗許是名為勤



王而實窺大物也陽樊不服則圖之王與之湯

弟之曰陽樊不服圖之若葛呼原不服又圖之

名雖受地於王實則以力取也五霸莫盛於桓

文然皆以力假仁而不本於德故能屈人之力

而無以服其心視昔成湯之興也東征而西怨

文王之作也大畏而小懷為何如哉臣故略叙

其事以信孟子之說

荀子曰粹而王粹謂純全也駁而霸駁雜也

臣按荀卿以粹駁二字而為王霸之分亦可謂

知言者也盖粹然出於仁義者王也仁而雜以

不仁義而雜以不義者霸也王者純乎道德而

霸者雜以功利此其所以異也荀卿之論王霸

# 王伯之異

仁人

霸

非一獨此為當於理它如隆禮尊賢重法愛民之別敬曰敬時之分皆非是故弗取焉

董仲舒曰夫仁人者正其誼不謀其利明其道不計其功是以仲尼之門五尺童子羞稱五伯伯讀曰霸為其先詐力而後仁義也

臣按孟子之後其能深闢五霸者惟仲舒為然蓋仁人者知正義而已利之有無不論也知明道而已功之成否不計也義謂天下合宜之理道謂天下通行之路其實一也霸者則惟利是謀而於義有不暇顧惟功是計而於道有不暇卹此所以見黜於孔氏之門也至本朝程顥又謂得天理之正極人倫之至者堯舜之道也用



其私心依仁義之偏者霸者之事也王道如砥  
本乎人情出乎禮義若履大路而行無復回曲  
霸者崎嶇反側於曲逕之中而卒不可入堯舜  
之道顓之言與孟子仲舒實相表裏故錄焉  
以上論王道霸術之異

真西山讀書記乙集上大學衍義卷第十四





聖賢  
沈人  
之法

真西山讀書記乙集上大學衍義卷第十五

格物致知之要二  
辨人

堯典帝曰疇咨若時登庸  
疇誰也咨訪問也若放

齊曰臣放齊名胤子朱啓明啓胤子朱堯之嗣子丹朱也

帝曰吁吁者歎其辭嚚訟可乎  
嚚謂口不道忠信

乎言不帝曰疇咨若予采  
采事也驩兜曰都  
驩兜臣

之也共工方鳩僝功  
共工官名世是官者亦四

共工方且鳩聚  
鳩聚也帝曰吁靜言庸遠  
靜謂無事之際

無言則能言用  
象恭滔天然也滔漫也言貌恭而心不

之惡浩瀚  
帝曰咨四岳四岳官名一人而總湯湯

而無極也  
洪水方割大也割害也蕩蕩懷山襄陵  
蕩蕩廣

也襄駕出其上  
浩浩滔天其勢大若漫天也下民

也大阜曰陵

# 聖賢觀人

其咨

咨也

有能俾父

使治此水者

僉曰

僉衆之辭四

岳與其所領諸侯之

在朝者同辭而對也

於鯀

我

於美也鯀崇伯一帝曰

吁咈哉

然之辭

方命圯族

敗也

方命者逆上之命也圯

人悻戾自用不從上令

與衆不和傷敗族類也

岳曰

異哉

試可乃已

也

乃已勿求其可以治

水

帝曰

往欽哉

帝從衆言令往

敬其事也

九載績用弗成

唐虞之時三載一考績

帝曰

咨四

岳

朕在位七十載堯以十七即天子汝能庸命異

朕位

同異遜

岳曰

否德忝帝位

也否德不德

曰明明揚

側陋

上明謂顯之下明謂已

有鰥在下

曰虞舜

虞氏舜名也

鰥無妻之名

師錫帝曰

錫與也

有鰥在下

曰虞舜

虞氏舜名也

鰥無妻之名

帝曰

俞然

予聞如何

言我亦聞此人也如何

岳

曰

曰瞽子

言舜乃瞽

父頑

心不則德義

母嚚

母舜後

曰瞽子

言舜乃瞽

父頑

心不則德義

母嚚

母舜後



上義見象傲象舜異母弟克諧以孝諧和烝烝乂不

格姦前說見帝曰我其試哉女于時女以女觀厥刑

于二女謂其所以刑釐降二女于嬀汭釐理降

水名汭水之內嬀于虞嬀婦也使為婦帝曰欽哉

此戒二女之辭使敬其為婦道也

臣按帝堯始問若時登庸之人而放齊以嗣子

朱對又問若采之人而驩兜以共工對又問可

以治水之人而四岳以鯀對丹朱之慢遊傲虐

與共鯀之凶此不當舉而舉之者也後問可以

異位之人而四岳以舜對此當舉而舉者也堯

於其不當舉者則吁而歎之於朱知其嚚訟於

共工知其靜言庸違於鯀知其方命圯族而才

堯之明德

朱共工不用

知鯀之西心而  
從衆言用堯

知舜之西心而  
從衆言用之

其當舉者則俞而然之既問其為人又妻以二  
女方放齊驩兜之舉何異後世庸闇之朝姦邪  
小人自相汲引者惟堯之明德如日中天萬象  
畢照片言之發洞中隱微有不能以遁者此其  
所以為聖歟然於朱於共工則不用而於鯀則  
用之者蓋前二者輔相之任所貴者德此則治  
水之任所取者材鯀雖狼懷自用而以治水言  
之則未有過之者故卒從衆言而命之此又可  
見聖人雖智周萬物而不自用其智也至於舜  
在側微潛德隱行何由徹於廟堂之上而岳言  
一發堯即然之曰吾固聞之矣然必問其德之  
詳而以二女試之又可見聖人之明雖是以知



聖人觀人

皋陶謨  
九德士

人然猶考諸衆言之公試以行事之實故無後  
世徇名之弊而有為天下得人之功雖然人主  
欲以堯為法將何所用力哉曰明其德而已蓋  
堯之知人不可學而能堯之明德可以學而至  
格物致知於天下之理無所疑勝私室欲於天  
下之物無所蔽此所以明其德也明其德者知  
人之本也有天下者可不勉諸

皋陶曰都在知人在安民禹曰吁咸若時惟帝其

難之咸若也若如也時是也言皆如所言知人則

哲能官人也哲智也安民則惠也惠愛也黎民懷之也懷謂心服也

能格而惠何憂乎驩兜也四凶也何遷乎有苗也遷徙也

君昏迷不恭者也何畏乎巧言令色孔壬也孔巧好也令善也

# 聖賢觀人

藏言四凶不言意說者謂指共正而臯陶曰都亦行有

九德亦言其人有德乃言曰載采采載行也禹曰

何五問之九如何謂也臯陶曰寬而栗寬洪而柔而立柔順

植立愿而恭愿恭而亂而敬有治亂之擾而毅擾順

而果而直而溫溫正直而簡而廉簡約而剛而塞塞實

健而彊而義堅強而彰厥有常吉哉彰顯也久而

猶善也曰宣三德宣達夙夜浚明有家浚治也家日

嚴祗敬六德亮采有邦有亮明也采事也翕受敷施

翕合也九德咸事咸皆俊又俊賢也在官人俊賢之才曰又百僚

師師百工惟時又僚僚工皆官也僚以人言工以事言

事各得其時撫于五辰撫順也五辰四時土寄旺於四庶

績其其時美庶衆也績功也凝

者成而堅定之意



仁智則存  
邪不肆

知人以德求之

事德

臣按臯陶陳謨于舜以知人安民為要禹謂二者雖帝堯且猶難之蓋知人者智之事也安民者仁之事也知人則官得其職安民則民懷其惠合智與仁二者無盡則雖有姦邪小人不足畏矣凡姦邪之所以害事者以人君不知其為姦邪也苟誠知之雖驩兜未放有苗未竄共工未流彼安能肆其惡哉故深歎其難而不敢易也臯陶則曰知人誠非易事然亦不過以德求之而已有德則為君子無德則為小人此知人之要也人之行凡有九德言人之有德者必觀其行事如何蓋德者事之本事者德之施徒曰有德而不見之事則德為虛言矣此又知人之

由之常  
不常

# 觀賢

三德大夫  
之戰

要也自寬而栗而下其目凡九或以剛濟柔或以柔濟剛渾全而無偏弊然後為成德觀其德之成與否而人才之優劣判矣此又知人之要也先儒謂自寬至強皆所稟之性自栗至義乃學問之力此說得之然有德者又貴乎常而不變若勉於暫不能持之久亦不足以言德矣故孔子曰人而無常不可以作巫醫人君能顯用有常之士則為國之福故曰彰厥有常吉哉以常與不常觀之其有常者為君子不能常者為小人是又知人之要也然人之於九德不能皆全或有其三或有其六惟上所用爾有三德者日宣達之無使沈滯則其人朝夕浚治而光明



六德諸侯  
之職

上用則  
下應

用人不必具

天道順

可任大夫之職矣有六德者日尊嚴而祗敬之  
無或慢忽則其人精明通達可任諸侯之職矣  
天下未嘗無才上之人有以淬勵興起之則下  
亦澡雪精神以應其求不然則頽靡昏惰安得  
有浚明亮采之氣象邪然三德之為大夫六德  
之為諸侯亦言其大法爾非必以數拘也天子  
者一世人才之宗主也九德之中苟有其一皆  
當兼收並蓄分布而用之使各隨所長而施於  
事則百官皆賢而互相觀法百工皆治而不失  
其時矣夫五辰在天而此以撫言者天人一本  
人事順則天道亦順也凝者凝定堅久之謂成  
功非難而堅久為難惟衆賢畢用百職具備則

貢德  
不以材

# 聖賢觀人

觀人之法

善之本在義

不為  
不善

其功可以堅久矣九德之名自皋陶始其後周  
公告成王亦欲其迪知忱恂于九德之行蓋古  
之論人者必貴於有德後世人主或以材能取  
人而不稽諸德行故有才無德之小人得以自  
售其不敗事者幾希皋陶之言真萬世知人之  
法也

子曰視其所以

所以為也

觀其所由

所以從也

察其所

安

所安所存也

人焉廋哉人焉廋哉

廋也

臣按此聖門觀人之法也凡人所為皆有偶合

於善者必觀其所從來其為義邪為利邪若其

本心實主於義則其善出於誠可以為善矣若

其本心實主於利則其善也非出於誠又安得



心不存  
不保常

女之自然必也  
之理

知人亦難

人君至明

為善乎然有所從雖善而非其心之所安者苟  
未能安焉則富貴可以淫貧賤可以移威武可  
以屈不能保其常不變也然則若之何為安曰  
猶水之寒猶火之熱自然而不可易猶飢之食  
猶渴之飲必然而不可已夫然後謂之安夫以  
孔子之聖其於人也以視為未足而復觀之以  
觀為未足而復察之然後人之情偽不得而隱  
況聖未如孔子者可以知人為易乎雖然視也  
觀也察也出於我者也苟我之心未能至公而  
無私至明而不惑其於人之情偽焉能有見乎  
以人君言之一身而照臨百官正邪忠佞雜然  
吾前豈易辨哉必也清其天君如鑑之明如水

觀人之法

君子之仁  
小人之不仁

君子之德  
人主取其仁

小人之巧

之止以為臨下燭物之本然後於人之所由所  
安庶乎其得之矣此又人君所當知也

子曰人之過也各於其黨

黨類也

觀過斯知仁矣

謂過

失誤也仁謂本心之德也

臣按此亦聖門觀人之法先儒以為人之過也  
各於其類君子常失於厚小人常失於薄君子  
過於愛小人過於忍以此觀之則人之仁不仁  
可知矣若夫為人君者尤當因臣下之過而察  
其心如愛君而極諫不無狂訐之過要其用心  
非仁乎取其仁而略其過可也愛民而違命不  
無矯拂之過要其用心非仁乎取其仁而略其  
過可也若姦邪之臣巧於揜覆未必有過之可



聖賢  
觀人

德言觀行

宰予能言無  
行孔子知更

君察心

指然其心何如哉凡此皆觀人之一端以類求之莫不然也

子曰始吾於人也聽其言而信其行今吾於人也聽其言而觀其行於予與改是

臣按此因宰予晝寢而言蓋予之為人能言而行不逮故孔子自謂始也聽人之言即信其行今也聽人之言必觀其行蓋因予而改此失也家語亦曰以言取人失之宰予夫以孔子之於門人高弟朝夕與處其正邪賢否安得逃聖鑒哉猶必觀其行而後誠偽可見況人君之尊其與臣下接固有時矣而欲以一應對之頃察知其心術不亦難哉故敷奏必以言而明試必以



古人惡之

臣又悅嗇夫之  
辯乃令張  
釋爭之

臣又信江充  
唐又宗信李  
訓卒以秋

聖賢  
觀人

功自堯舜以來不易之法也夫巧言如簧詩人  
刺之利口覆邦聖人所惡有言者不必有德而  
佞者不知其仁故漢文悅嗇夫之對拜為上林  
令而張釋之爭之以為絳侯勅東陽侯如張相稱  
為長者此兩人言事曾不能出口豈效此嗇夫  
喋喋利口哉今以其口辯而超遷之臣恐天下  
隨風而靡文帝乃止當是時將相大臣皆少文  
多質議論務在忠厚耻言人之過失迄成醇厚  
之俗其後武帝之於江充唐文宗之於李訓皆  
以應對敏捷悅而信之巫蠱甘露之禍幾至亡  
國故因宰予之事及之以見聽言觀行之訓  
為不可易也



子游為武城宰

澹臺行不由徑  
非公事不至

君之相擇人  
是也

子游為武城宰子偃字子游孔子弟子子曰女得人

焉爾乎曰有澹臺滅明者澹臺姓行不由徑之徑路

而捷者非公事未嘗至於偃之室也公事如鄉飲鄉社讀法之類

臣按子游以行不由徑非公事不至其室而知

澹臺之賢蓋二者雖若細行因而推之行且不

由徑其行已也肯枉道而欲速乎非公事且不

至其室其事上也肯阿意以求悅乎子游以一

邑宰其取人猶若是等而上之宰相為天子擇

百僚人主為天下擇宰相必以是觀焉可也故

王素之論命相欲求宦官宮妾不知名之人而

司馬光之用諫官亦取不通書問者為之必若

是然後剛方正大之士進而奔競諂諛之風息

善者好  
不善者惡

無善不善

好

皆惡

觀人  
賢

矣

子貢問曰鄉人皆好之何如曰未可也鄉人皆惡  
之何如曰未可也不如鄉人之善者好之其不善  
者惡之

臣按此論觀人於一鄉者當如是也推之於國

於天下亦莫不然夫人之善否不同而好惡亦  
異故善者不善之所仇而不善者亦善人之所  
弗與也若人無善否翕然好之則是雷同于譽  
者之所為孟子所謂鄉原者也若人無善否翕  
然惡之雖未見所以致之之由然其人亦可知  
矣故必善者好之不善者惡之是其制行之美  
有以取信於君子而立心之直又不苟同於小



古之好惡

忠邪易位

君明好惡

察好惡

人則其為賢者必矣陳蕃李膺之徒天下稱其  
賢而中常侍目之曰鉤黨裴度之為人天下仰  
其勲德而八關十六子輩毀之者百端此所謂  
善者好之而不善者惡之也然好者雖多其言  
未必上徹惡者雖少其論常譁於人主之前所  
以誣善之言易行而忠邪每至於易位也為人  
君者將柰何曰明四目達四聰使天下公論皆  
得上聞而姦邪不得以壅蔽則是非好惡之實  
庶乎其不繆矣

子曰衆惡之必察焉衆好之必察焉

臣按好善惡惡雖人性之本然而違道之譽求  
全之毀亦世之所有故不可以不察也臣章之

匡章不孝

仲子之廉

孟子通當

仁之

齊威王阿

封墨

巧言不仁

木訥近仁

不孝人所共稱也而孟子則曰此父子責善之過爾非不孝也仲子之廉亦人所共稱也而孟子則責其避兄離母之罪曰此烏能廉哉是是非非之大致固若黑白之了然而其似是而非似非而是者則常人之所易惑也不有聖賢原情於疑似之中考實於曖昧之際烏能適其當乎自人君言之必如齊威王之烹阿封即墨然後為能察是非之實不然則未有不以毀譽而亂真者

子曰巧言令色鮮矣仁

巧好也令善鮮少也

子曰剛毅木訥近仁

剛者堅剛也訥者果敢也木者質樸也

臣按巧言令色之人以虛偽勝故鮮仁剛毅木



觀人

近仁

鮮仁

周勃近仁

董馬不仁

訥之人以質實勝故近仁仁者本心之全德必  
致知必力行然後能造乎其地豈剛果樸鈍所  
能遽得哉然誠而不偽質而不華則其本心未  
失於仁為不遠矣故曰近仁若好其言善其色  
致飾於外求以悅人則其偽而不誠華而不實  
去本心也遠矣其能為仁者幾希兩章之言實  
相表裏由後世觀之安劉氏者乃椎鈍木強之  
周勃而令色諛言如董賢者卒以禍漢室焉勃  
未得為仁人也而忠誠徇國惟一無二其質近  
乎仁矣惜其不學故止於是焉若賢則不仁之  
尤者也然樸忠之臣難合而巧佞之士易親故  
不仁者往往得志於世治亂存亡常必由此鳴

不知言  
無知人

畔者辭慙

疑者辭枝

人辭寡

躁人辭多

善善辭游

失守辭誦

聖賢

呼人主其亦謹所擇哉

子曰不知言無以知人也

臣

按易之大傳曰將畔者其辭慙中心疑者其辭枝吉人之辭寡躁人之辭多誣善之人其辭游失其守者其辭誦此因言觀人之法也為人君者尤當知之蓋人之將為惡也必有愧於中故其辭慙見理不明中心眩惑故其辭枝枝謂支離而多端也端良易直之人言不苟發故簡而寡狂妄躁急之人言常輕發故繁而多誣毀善良中懷羞惡故其辭游揚而不確操守不堅奪於利害故其辭困屈而易窮有諸中必形諸外不可揜也故不知言則無以知人雖然緘默



以寡以多  
不可不察

人君真知

君子周  
小人比

君子  
小人之  
念異

不言者有似乎寡數陳無隱者亦近乎多聽言者苟不察焉則懷姦者得吉士之名盡忠者入躁人之目豈不誤哉惟人君於此知古人之辭簡而當理非緘默不言之謂躁人之辭繁而悖理非數陳無隱之謂於近似之中察其甚不同然後為真知言者矣大傳之言與此章同出於孔子故併論焉

子曰君子周而不比小人比而不周

周普偏也  
比偏黨也

臣按君子之心與物為公故周而不比小人之  
心惟己是私故比而不周

子曰君子懷德

懷思  
念也

小人懷土君子懷刑小人懷

惠

君子蕩

小人戚

君子成人

小人成人

君子和

小人同

臣按君子所好者善故懷德小人所志者安故懷土君子所畏者法故懷刑小人所徇者利故懷惠懷懷者常存於心之謂

子曰君子坦蕩蕩

坦平夷也蕩蕩寬廣貌

小人長戚戚

臣按君子安於義理故常坦然有自得之意小人役於物欲故常戚然懷不足之憂

子曰君子成人之美不成人之惡小人反是

臣按君子之心好善故惟恐人之不為善善則獎而成之小人之心疾善故惟恐人之為善善則沮而敗之成人之善則不成人之惡矣成人之惡則不成人之善矣

子曰君子和而不同小人同而不和



聖賢

觀人

君子易事

難悅

人難事

易悅

君子泰

小人驕

臣按君子之於人以可否相濟故和而不同小人之於人以朋比相親故同而不和

子曰君子易事而難說也說之不以道不說也及其使人也器之小人難事而易說也說之雖不以道說也及其使人也求備焉

臣按君子之心平恕故易事其情正大故難說惟其平恕故使人各取其所長小人之心刻覈故難事其情偏私故易說惟其刻覈故用人必責其全備

子曰君子泰而不驕小人驕而不泰

臣按君子循理故安舒而不矜肆小人逞欲故矜肆而不安舒泰者心廣而體胖驕者意盈而

小人小人  
上達異

君子求己  
小人求人

君子大受  
小人小知

觀人  
解賢

氣盛

子曰君子上達小人下達

臣按君子以窮理為事故日進乎高明小人以徇欲為事故日究於汙下

子曰君子求諸己小人求諸人

臣按君子自責而不責人故求諸己小人責人而不自責故求諸人

子曰君子不可小知而可大受也小人不可大受而可小知也

臣按君子所存者大故不可以小事測知而可以當大事小人局於狹小其長易見故不可以任大而可以小知



君子義  
小人利

小人  
利  
天下

子曰君子喻於義小人喻於利

喻猶曉也

臣按義者天理之公利者人欲之私君子之心

惟知有義故於義見得分明小人之心唯知有

利故於利無不通曉自比周而下凡十有一章

皆言君子小人所為之相反而其大端不越於

公私義理而已孔子本指欲學者知君子小人

之分而審夫取舍之幾

臣

今於此欲人主知君

子小人之辨而致謹於用舍之際聖人之言蓋

無適而不宜也嗚呼自昔姦邪小人之所以為

天下禍者雖非一端然未有不以私與利為之

者利即私也私即利也苟利其身雖君父之安

危弗顧也苟利其家雖社稷之存亡弗恤也然

近臣賢則  
必求遠臣

人之賢愚  
在眸子

# 聖賢觀人

則人主於平時用舍之際其可不察諸此乎  
孟子曰觀近臣以其所為主觀遠臣以其所主王

臣按君子小人各從其類故近臣而賢必能舉  
遠臣之賢者遠臣而賢亦必有近臣之賢者以  
舉之故觀其所舉之賢否則近臣之為人可知  
觀其舉者之賢否則遠臣之為人可知

孟子曰存乎人者莫良於眸子眸子目也眸子不

能掩其惡曾中正則眸子瞭焉曾中不正則眸子

眊焉瞭明也眊不明之貌聽其言也觀其眸子人焉廋哉

臣按目者精神之所發而言者心術之所形故

審其言之邪正驗其目之明昧而其人之賢否



視行  
置相

魏成中  
克言以  
賢

不可掩焉此觀人之一法也

魏文侯問置相於李克克曰居視其所親富視其

所與達視其所舉窮視其所不為貧視其所不取

臣按文侯問擇相而李克以此五者為言蓋居

而不妄親所親者必賢富而不妄予所與者必

當達而不妄舉所舉者必善雖窮困而不為非

義之事雖貧匱而不取非義之財無此五者非

君子不能故可以當大臣宰相之任李克此言

亦庶幾得觀人之要矣是時有魏成者食祿千

鍾什九在外什一在內是以得卜子夏田子方

段干木而進之文侯皆以為師李克之言雖非

專為成發然非成莫能當者故文侯卒相之後

之論相者其尚有考焉

以上論聖賢觀人之法

臣按朱熹有言知人之難堯舜以為病孔子亦有聽言觀行之戒然嘗思之此特為小人設耳若皆君子則何難之有哉蓋天地之間有自然之理凡陽必剛剛必明明則易知凡陰必柔柔必闇闇則難測故聖人作易遂以陽為君子陰為小人其所以通幽明之故類萬物之情者雖百世不能易也嘗竊推易說以觀天下之人凡其光明正大踈暢洞達如青天白日如高山大川如雷霆之為威而雨露之為澤如龍虎之為猛而麟鳳之為祥磊磊落落無纖芥可疑者必

陽

子

陰

子



君子也而其依阿譎諂回互隱伏糾結如蛇蚓  
瑣細如蟣蟲如鬼蜮狐蟲如盜賊詛祝閃倏狡  
獪不可方物者必小人也君子小人之極既定  
於內則其形於外者雖言談舉止之微無不發  
見而況於事業文章之際尤所謂粲然者彼小  
人者雖曰難知而亦豈得而逃哉臣謂熹之言  
深有得於大易微旨人主以是觀人思過半矣  
故附著焉



1.

法華普賢

無量壽佛入甚妙門入三摩地

白檀法華經入甚妙門入三摩地

白檀法華經入甚妙門入三摩地

白檀法華經入甚妙門入三摩地

白檀法華經入甚妙門入三摩地

白檀法華經入甚妙門入三摩地

法一

中溪家藏

奇







